

– Բոլորովին ճիշտ է, – ընդմիջեց Ասլանը, որ լուռ լսում էր: – Բարձր քաջութիւնը անձնագոհութիւն է պահանջում, իսկ անձնագոհութիւնը առանց բարձր իդէալների չէ կարող լինել:

Նա դարձեալ լռեց եւ կարծես այլեւս չէր լսում մեզ: Ես հարցրի.

– Ուրեմն ձեզնից վախենում են:

– Ասած է՝ «թուրքին ծեծիր, հետը բարեկամացի՛ր», – պատասխանեց Արթինը: – Ախար այդ առաձը խօ այսօր չէ կազմուել. դա հարիւրաւոր, գուցէ հազարաւոր տարիների փորձերի վերջին խօսքն է: Եւ ես ինքս փորձել եմ այդ: Այդ գառան խորովածը, որ հիմա կերանք, գիտե՞ք ով էր ուղարկել, մի քուրդ աւագակապետ, որի ոչխարները արածում են մեզանից փոքր-ինչ հեռու ձորի մէջ: Իմանալով, որ իմ քարաւանը իջեւանել է իր չադրաների մերձակայքում, իր որդու ձեռքով ուղարկել էր երկու գառ եւ պատուիրել էր հարցնել իմ առողջութիւնը:

– Իսկ դուք գառների փոխարէն ի՞նչ ուղարկեցիք նրան:

– Իմ ողջոյնը եւ մի թօփ Շամի ալաջայ նրա կանանց հագուստի համար:

– Երեւի այդ քուրդը մի ժամանակ գործ է ունեցել ձեզ հետ:

– Այո՛, մի անգամ սաստիկ ջարդոեցաւ, եւ այնուհետեւ բարեկամացանք: – Ինձ ներեցէք, – ասաց նա վեր կենալով, – ես երկար նստեցի եւ շատ խօսեցի: Ես պէտք է տեսնեմ, թէ ի՞նչ են շինում տղերքը, իսկ դուք կարող եք այստեղ հանգստանալ: Ձեզ համար ամէն ինչ պատրաստել են:

– Առաւօտեան հարկաւոր են երկու լաւ ձիաւորներ, – ասաց Ասլանը: – Ես պէտք է քարաւանից առաջ ընկնեմ, մի քանի տեղեր տեսնելու համար:

– Ես կը տամ քեզ իմ մարդիկներից երկու այնպիսի ձիաւորներ, որոնց մէկը հարիւրի պատասխան կը տայ, – խոստացաւ նա եւ, բարի գիշեր ասելով, հեռացաւ:

Ասլանը այս գիշեր սովորականից վաղ քնեց. Վանի մէջ կատարած ծանր աշխատութիւններից յետոյ այդ առաջին գիշերն էր, որ նա հանգստանում էր: Տէր աստուած, ի՞նչ էր նրա դրութիւնը, մի տենդային դրութիւն, մի սաստիկ լարած մեքենայի դրութիւն, որ հանգիստ եւ դադարում չունի:

Ես դեռ պառկած էի իմ անկողնի մէջ, քունս չէր տանում. իմ աչքերի առջեւ դեռ նկարուած էր Թոխամախ-արթիկի թաւամագ դէմքը իր մռայլ կերպարանքով եւ սեւ, վառվռուն աչքերով: Այդ մարդը պարծենկոտ չէր. ինչ որ խօսում էր նա, ինչ որ պատմում էր, բոլորը ճշմարիտ էր: Նա, իրաւ, քաջ